



Optimizam je u prirodi svakog muslimana (Meka)

Hatib: dr. Abdullah ibn Avad el-Džuheni

23. rebius-sani 1444. po Hidžri / 18. novembar 2022.

Hvala Allahu na Njegovim nepresušnim blagodatima, koje ne možemo pobrojati i na kojima Mu ne možemo nazahvaljivati. Svjedočim da nema boga osim Allaha, jedinog, Koji nema druga, i Koji sve zna, i svjedočim da je naš prvak i vjerovjesnik Muhammed, sallallahu alejhi ve sellem, Njegov rob i poslanik, koga je On odabrao da dostavi Njegovu poslanicu i da Mu čini ibadet, neka su na njega Allahova milost, spas i blagoslov, i na njegovu porodicu i ashabe i sve one koji ih slijede do Sudnjeg dana. Moja najbolja oporuka vama je oporuka koju je Allah uputio svim Svojim robovima: "Allahovo je ono što je na nebesima i ono što je na Zemlji. Mi smo onima kojima je data Knjiga prije vas, a i vama, već zapovjedili da se bojite Allaha. A ako ne budete vjerovali – pa, uistinu, Allahovo je ono što je na nebesima i ono što je na Zemlji, Allah nije ni o kome ovisan i On je hvale dostojan!" (En-Nisa, 131)

Postavite pokornost Allahu kao zaštitu od Njegove kazne, a pokornost Njemu i Njegovom Poslaniku kao pregradu između vas i vrućine džehennemske vatre.

O muslimani, Allahov Poslanik, sallallahu alejhi ve sellem, poslan je s radosnom viješću svojim sljedbenicima, a s opomenom svojim neprijateljima. Štaviše, zadaća svih poslanika mogla bi se svesti na ova dva svojstva. Uzvišeni kaže: "Mi šaljemo poslanike samo zato da donose radosne vijesti i da opominju; neka se zato oni koji vjeruju i dobra djela čine ničega ne boje i ni za čim neka ne tuguju." (El-En'am, 48)

Allah, džellešanuhu, u Svojoj plemenitoj Knjizi, u mnogim ajetima, naredio je – Svom Poslaniku – da obraduje vjernike, strpljive, dobročinitelje i one koji su ponizni pred Allahom. Jedna od Poslanikovih, sallallahu alejhi ve sellem, metoda u prenošenju radosnih vijesti bila je biranje odgovarajućeg vremena i načina u savjetovanju i prenošenju znanja, kako ne bi kod njih stvorio odbojnost prema dobru kojem ih je





učio. Kada je poslao Ebu Musaa el-Eš'arija i Muaza ibn Džebela, radijallahu anhuma, u Jemen, rekao im je: "Olakšavajte a ne otežavajte, obveseljavajte, a ne rastjerujte, i zbližavajte, a ne razjedinjujte." (Buhari)

Ibn Hadžer, Allah mu se smilovao, u komentaru ovoga hadisa, kaže: "Cilj je pridobiti srca ljudi koji su novi u islamu i izbjegavati strogoću prema njima u početku njihovog pozivanja. Također, odvratanje od grijeha treba biti na blag način, kako bi bilo prihvaćeno, a u podučavanju ljudi treba slijediti princip postepenosti, jer ako je nešto (u ovom slučaju vjera), u početku, lako, bit će prihvatljivije za ljudsku dušu i takva stvar, u većini slučajeva na kraju, doživi progres."

Tebšir – obveseljavanje, o vjernici, bio je Poslanikov, sallallahu alejhi ve sellem, princip koji je uvijek koristio, a od njegove upute je i da je pohvalno govorio o svakome ko je zaslužio pohvalu, i obradovao ga je hajrom i lijepim završetkom, čime je želio podstaći te ljude, ali i druge, da budu pokorni Allahu, i zbog toga je obaveza svakog muslimana da nastoji biti od onih koji će ljudima prenositi radosne vijesti, obveseljavati ih i čestitati im na svakom dobru. Vjerodostojnim putem potvrđeno je da je Poslanik, sallallahu alejhi ve sellem, rekao Ebu Hurejri, radijallahu anhu: "Uzmi ove moje dvije papuče, i koga god sretnoš, izvan ove bašte, a bude svjedočio da nema boga osim Allaha, s čvrstim ubjedenjem u srcu, obraduj ga Džennetom." (Muslim)

Obveseljavanje ljudi i čestitanje na postignutom uspjehu vrlo je važna stvar koju islam, kroz svoj odgoj, nastoji usaditi kod odgajnika, zbog njegovog pozitivnog efekta i podsticaja na činjenje dobra i ustrajnosti u pokornosti, a jedan od takvih primjera jesu riječi Poslanika, sallallahu alejhi ve sellem: "One koji u tmuni noći idu u džamiju obraduj potpunim svjetlom na Sudnjem danu." (Ibn Madža)

Jednom je Poslanik, sallallahu alejhi ve sellem, klanjao sa ashabima jaciju, pa im je, prije nego što su otišli svojim kućama, rekao: "Polako, želim vas obradovati: Allah vam je ukazao Svoju blagodat time da ste vi jedini ljudi (na cijelom svijetu), koji u ovom trenutku obavljate namaz." Ebu Musa el-Eš'ari, radijallahu anhu, rekao je: "Vratili smo se kućama presretni zbog onoga što smo čuli od Allahovog Poslanika, sallallahu alejhi ve sellem." (Buhari)





Vjerniku je u iskušenjima potreban neko ko će razgaliti njegovu dušu i obradovati ga ili skorim providenjem ili onosvjetskom nagradom. Poslanik, sallallahu alejhi ve sellem, zatekao je Ummu Ala bolesnu, pa joj je rekao: "Raduj se, Ummu Ala, bolest koja zadesi muslimana čisti njegove grijehе kao što vatra čisti trosku sa željeza." (Tirmizi)

O vjernici! Musliman je podrška ljudima u nevolji, odagnava od njih tugu i unosi radost u njihova srca. Zejd ibn Erkam, radijallahu anhu, pisao je Enesu u vrijeme bitke u predgrađu Medine po imenu Harra, izražavajući mu saučesće (taziju) za poginule sinove i pripadnike njegovog plemena, pa je napisao: "Prenosim ti radosnu vijest koju sam čuo od Allahovog Poslanika, sallallahu alejhi ve sellem, koji je rekao: 'Allahu moj, oprosti ensarijama, sinovima ensarija i njihovim sinovima.'" (Ahmed)

O muslimani, Allah je obećao onima koji vjeruju i koji se Njega budu bojali "da im pripadaju radosne vijesti i na ovome i na onome svijetu – Allahove riječi niko ne može izmijeniti – to će, zaista, velik uspjeh biti" (Junus, 64).

Od radosnih vijesti na ovom svijetu jeste da musliman bude lijepo prihvaćen kod svoje braće i da mu zahvale na dobročinstvu, a i to je vrsta obveseljavanja. Imam Muslim zabilježio je hadis u kojem se kaže: "Allahov Poslanik, sallallahu alejhi ve sellem, upitan je: "Šta ako čovjek uradi dobro djelo i ljudi ga pohvale zbog toga?", pa je rekao: "To je radosna vijest za njega još na ovom svijetu."

O vjernici, zar nakon svih navedenih dokaza neko od nas može prihvatiti da bude pesimista i da širi pesimizam među ljudima, tjera ljude od vjere i ubija u njima njihove kapacitete i mogućnosti, ili bi trebali obveseljavati, širiti optimizam, oživljavati duše, podsticati na činjenje dobra, pomagati druge u dobru, podizati ambicije i da svako od nas bude moralna potpora svojoj braći, da u njima oživljava nadu i podstiče ih na ustrajnost i povećanje dobrih djela. Bojte se Allaha, o vjernici, i govorite ljudima lijepe riječi, obveseljavajte, a ne rastjerujte, jačajte svoju vezu sa Allahom i svoje slijeđenje Njegovog Poslanika, sallallahu alejhi ve sellem.





Uzvišeni kaže: "Za one koji izbjegavaju da se kumirima klanjaju i koji se Allahu obraćaju - njima su namijenjene radosne vijesti, zato obraduj robove Moje koji Kur'an slušaju i slijede ono najljepše u njemu; njima je Allah na Pravi put ukazao i oni su pametni." (Ez-Zumer, 17–18)

O ljudi, bojte se Allaha, držite se čvrstog užeta islama, pazite se srdžbe Silnog, jer vaša stopala ne mogu podnijeti Vatru i znajte da vas smrt može zaobići i otići drugima, ali će i druge zaobići i doći vama, i zato budite oprezni, pripremite se za susret sa svojim Gospodarom i čvrsto se držite Allahove Knjige, jer je ona najistinitiji govor i najljepše kazivanje, Njegov sud je pravedan, Njegov govor je jasan i Njegovo obećanje je istinito, i držite se sunneta svoga vjerovjesnika, jer je on tumač Kur'ana, i čuvajte se novotarija u vjeri i u šerijatu, svaka uvedena stvar u vjeru je novotarija, svaka novotarija je zabluda, a svaka zabluda vodi u Vatru.

Donosite salavate na onoga koji je došao sa radosnom viješću i opomenom, koji je jasna svjetiljka, vlasnik Havda i šefata, našeg vjerovjesnika Muhammeda el-Emina, sallallahu alejhi ve sellem, to vam je naredba od vašeg Gospodara, Koji kaže: "Allah i meleki Njegovi blagosiljaju Vjerovjesnika. O vjernici, blagosiljajte ga i vi i šaljte mu pozdrav!" (El-Ahzab, 56)

